

Pelbagai Jenis Nasihat

Daripada Abi Ruqayyah, Tamim al-Dariy RA, bahawa Nabi SAW bersabda:

الدِّينُ النَّصِيحَةُ، قُلْنَا: لِمَنْ؟ قَالَ: لِلَّهِ، وَلِكِتَابِهِ، وَلِرَسُولِهِ، وَلِأُمَّةِ الْمُسْلِمِينَ، وَعَامَّتِهِمْ.

Maksudnya: "Agama itu merupakan nasihat. Kami bertanya: Untuk siapa? Sabda Baginda: Bagi Allah, Kitab-Nya, Rasul-Nya, pemimpin-pemimpin orang Islam dan masyarakat semuanya."

Riwayat Muslim (55), Abu Daud (4944) dan al-Nasaie (7/156)

Pedoman dan Iktibar Hadis

Antaranya:

1. Agama itu adalah nasihat. Ini bererti bahawa agama itu terletak pada nasihat. Ini kerana pada nasihat mengandungi taat kepada Allah dan kepada Rasul-Nya, beriman serta beramal dengan kitab-Nya dan sunnah Rasul-Nya. Dalam bahasa Arab, nasihat diambil daripada dua perkataan seperti:
 - Mereka berkata *نَصَحَ الرَّجُلُ تَوْبَهُ* (seorang lelaki menjahit kainnya). Maksudnya, orang yang berkehendak untuk memperbaiki kainnya dengan menjahit yang koyak.
 - Mereka berkata *نَصَحْتُ الْعَسَلُ* (aku menapis manisan). Maksudnya, menggunakan kata-kata yang halus serta ikhlas, bersih dari maksud yang tidak baik.

2. Pada istilah sebagaimana kata Imam Muhammad bin Nasr al-Marwazi Rahimahullah ialah *prihatin hati terhadap orang yang dinasihati sama ada fardu atau sunat*. Mengikut hadis di atas nasihat dibahagikan kepada lima:
 - Nasihat kepada Allah.
 - Nasihat kepada kitab-Nya.
 - Nasihat kepada Rasul-Nya.
 - Nasihat kepada pemerintah orang Islam.
 - Nasihat kepada orang awam.

3. Maksud sebenar nasihat kepada Allah ialah mengikut perintah Allah, manakala nasihat kepada kitab-Nya ialah dengan membaca, memahami, tadabbur seterusnya mengamalkannya sama ada perintah suruhan atau larangan. Sungguhpun nasihat kepada rasul-Nya, dengan mengasihi Rasulullah, memahami sunnahnya seterusnya dapat mengikut kehidupan hariannya. Nasihat kepada imam orang Islam ialah dengan cara yang baik dan penuh dengan *fiqh al-dakwah* serta *fiqh al-nasihah*.

4. Seterusnya nasihat kepada orang awam hendaklah disertai dengan kebenaran dan kesabaran supaya ianya dapat dijayakan dengan cemerlang. Firman Allah SWT:

كُنْتُمْ خَيْرَ أُمَّةٍ أُخْرِجَتْ لِلنَّاسِ تَأْمُرُونَ بِالْمَعْرُوفِ وَتَنْهَوْنَ عَنِ الْمُنْكَرِ
 وَتُؤْمِنُونَ بِاللَّهِ وَلَوْ آمَنَ أَهْلُ الْكِتَابِ لَكَانَ خَيْرًا لَهُمْ مِّنْهُمُ الْمُؤْمِنُونَ
 وَأَكْثَرُهُمُ الْفَاسِقُونَ ﴿١١٠﴾

Maksudnya: Kamu (wahai umat Muhammad) adalah sebaik-baik umat yang dilahirkan bagi (faedah) umat manusia, (kerana) kamu menyuruh berbuat segala perkara yang baik dan melarang daripada segala perkara yang salah (buruk dan keji), serta kamu pula beriman kepada Allah (dengan sebenar-benar iman). Sekiranya ahli kitab beriman tentulah itu lebih baik bagi mereka, di antara mereka ada yang beriman dan kebanyakan mereka adalah orang-orang yang fasik.

(Surah Ali-Imran: 110)

5. Abu Laith al-Samarqandi di dalam kitabnya *Tanbih al-Ghafilin* berkata: Seorang yang akan menjalankan amar makruf dan nahi mungkar harus melengkapi beberapa syarat:
- Berilmu, sebab orang yang bodoh tidak memahami makruf dan mungkar.
 - Ikhlas kerana Allah dan menegakkan agama.
 - Kasih sayang kepada yang dinasihati, dengan baik dan ramah mesra dan jangan menggunakan kekerasan.
 - Harus mengerjakan apa-apa yang dianjurkan supaya tidak dikeji orang atas perbuatannya sendiri.
6. Betapa pentingnya isu nasihat sehingga seorang ulama mengarang buku yang bertajuk *Fiqh al-Nasihah*.

Mutiara Hikmah

- ❖ **Abdullah bin al-Mubarak Rahimahullah berkata:** Tiadalah yang kekal pada zaman kita seseorang lebih diketahui bahawa mengambil nasihat dengan berlapang dada.
- ❖ Seorang lelaki bertanya kepada **Abdullah bin al-Mubarak Rahimahullah:** Adakah masih kekal pemberi nasihat? Jawabnya: Adakah kamu mengetahui siapa yang menerimanya.

Kisah Teladan

Dalam kitab *al-Bidayah wa al-Nihayah*, jilid ke-12, Imam Ibn Kathir meriwayatkan bahawa Sultan Nuruddin Mahmud, salah seorang sultan Islam yang sentiasa melakukan *qiyamullail* di malam hari dan berpuasa di siang hari. Bahkan Imam Ibn Taimiyah pernah mengatakan tentang sultan ini: Semoga Allah merahmati tulang-

تulang sultan yang satu ini. Ini kerana Allah membahagi-bahagikan ketakwaan yang tua dengan yang muda, antara yang merah dan yang hitam, akan tetapi Allah membahagi-bahagikannya kepada siapa sahaja yang Dia kehendaki kerana Allah Maha Mengetahui hati-hati yang berhak untuk mendapatkannya.

Sultan Nuruddin ini ditimpa oleh masa-masa kritis dan kelalaian, tatkala dia meminta kehadiran bala tenteranya di Damsyiq dan telah dilaksanakanlah pesta secara besar-besaran yang dihadiri oleh para gabenor, menteri, dan panglima, serta khalayak ramai dan penduduk Damsyiq dalam suasana yang sangat ramai dan pesta yang sangat meriah.

Di kala perayaan ini selesai, salah seorang ulama Islam yang bernama Ibn al-Wasiti masuk dengan pakaian sederhananya, dia berdiri di hadapan sultan, lalu dia berkata: Wahai sultan yang agung, dengarkanlah dengan baik terhadap janji daripada Allah, Maha Raja Langit dan bumi. Tiba-tiba orang ramai senyap dan berhenti berpesta, mereka menunggu apa yang akan diucapkan syeikh besar ini. Tuan syeikh itu berbicara kepada sultan di kala ia berada di atas singgahsana kerajaannya:

مَثَلٌ وَقُوفِكَ أَيُّهَا الْمَغْرُورُ ❁ يَوْمَ الْقِيَامَةِ وَالسَّمَاءِ تَمُورُ
 إِنَّ قَيْلَ نُورِ الدِّينِ رَحَتْ مُسْلِمًا ❁ فَاحْذَرِ بَانَ تَبْقَى وَمَا لَكَ نُورٌ

Wahai manusia yang tertipu, anggaplah dirimu,

Kini berada pada hari kiamat dan langit bergoncang,

Jika dikatakan: Nuruddin datang berserah diri.

Hati-hatilah engkau datang tanpa memiliki nur (cahaya)

Akhirnya, Sultan Nuruddin pun menangis.